

Iktibar daripada peristiwa di Turki

Sudut Pandang

Oleh PROF. DATUK DR. MOHAMMAD SHATAR SABRAN
Pakar Sosial dan
Timbalan Naib Canselor
(Hal Ehwal Pelajar dan Alumni),
Universiti Putra Malaysia



BULAN lalu, seluruh dunia dikejutkan lagi dengan peristiwa letupan di Turki, negara yang sangat popular sebagai destinasi pelancongan rakyat Malaysia.

Hampir setiap bulan, rakyat negara ini akan melancong ke negara itu kerana keindahan alam semula jadi dan beberapa peninggalan sejarah Islam.

Walaupun Turki merupakan destinasi pelancongan yang popular, penulis yakin masih ramai dalam kalangan masyarakat di negara ini tidak mengenali sikap dan tahap kecintaan masyarakat Turki kepada negara dan kerajaan mereka sehinggalah peristiwa cubaan rampasan kuasa yang berlaku baru-baru ini.

Peristiwa cubaan rampasan kuasa oleh pihak tertentu daripada kerajaan yang dilantik secara sah oleh rakyat Turki gagal mencapai matlamat mereka walaupun mendapat sokongan daripada sekumpulan tentera dan mungkin daripada pihak luar.

Kegagalan cubaan rampasan kuasa yang dilakukan oleh pihak tertentu di negara itu bukanlah disebabkan kekuatan Presiden atau Perdana Menteri Turki mempertahankan negaranya daripada dirampas oleh pihak tersebut tetapi ia datang daripada perpaduan rakyat Turki itu sendiri.

Perpaduan yang kuat dalam kalangan rakyat Turki mempertahankan kerajaan yang dipilih secara sah oleh mereka merupakan rahsia dan senjata utama yang menyelamatkan kerajaan Turki daripada menjadi mangsa kepada cubaan rampasan kuasa tersebut.

Benarlah pepatah Melayu yang mengatakan, bersatu kita teguh bercerai kita roboh.

Mahasiswa di negara ini seharusnya mengambil pengajaran daripada peristiwa di Turki kerana mereka adalah tiang seri negara.

Dengan jumlah yang mencecah hampir 1.3 juta orang, mahasiswa



KEGAGALAN cubaan rampasan kuasa di Turki datang daripada perpaduan rakyat Turki itu sendiri ketika mempertahankan negaranya daripada dirampas.



MAHASISWA perlu bersifat lebih agresif menentang usaha memburukkan negara dan kerajaan. - Gambar hiasan

mempunyai kekuatan yang amat hebat untuk mempertahankan negara ini daripada diceroboh oleh pihak yang tidak bertanggungjawab sama ada dalam ataupun luar negara.

Untuk membolehkan matlamat sedemikian dapat dicapai, mahasiswa di negara ini perlulah bersedia untuk melaksanakan tiga tugas dan tanggungjawab seperti berikut:

1 Mahasiswa perlu sentiasa bersatu menentang sebarang tindakan daripada pihak yang ingin menjatuhkan kerajaan yang telah dipilih oleh rakyat secara sah.

Sebagai warganegara yang mempunyai sifat intelektual yang tinggi, mahasiswa seharusnya mampu untuk melihat jauh ke

hadapan dan tidak mudah terpedaya dengan hasutan serta pujukan daripada pihak yang hanya berhasrat untuk mencapai matlamat dan agenda peribadi.

2 Mahasiswa jangan mudah percaya kepada maklumat dan informasi yang disampaikan melalui media sosial yang memburukkan negara dan kerajaan.

Mahasiswa juga perlu sedar usaha menjatuhkan kerajaan yang sah ini tidak akan berhenti sehingga matlamat kumpulan atau individu tersebut tercapai. Namun, usaha mereka akan menjadi sia-sia sekiranya seluruh mahasiswa di negara ini sentiasa bersatu mempertahankan negara dan kerajaan yang sedia ada.

sepertimana yang ditunjukkan oleh masyarakat Turki pada bulan lepas.

3 Mahasiswa perlu bersifat lebih agresif menentang usaha memburukkan negara dan kerajaan.

Dengan jumlah yang ramai ini, pastinya suara dan tindakan mahasiswa amat digeruni oleh kumpulan dan individu yang tidak bertanggungjawab ini.

Nyatakan kepada mereka, mahasiswa di negara ini tidak boleh diperdayakan dan dijadikan batu loncatan untuk mencapai matlamat dan agenda peribadi mereka.

Mahasiswa perlu menjadi benteng utama negara daripada sebarang ancaman musuh dari dalam dan luar negara.

Penulis yakin sekiranya mahasiswa mampu mengaplikasikan tiga kriteria utama tersebut, pastinya negara ini bebas daripada sebarang ancaman atau usaha pihak tertentu untuk menghancurkan keamanan dan kedamaian yang telah dinikmati oleh masyarakat semenjak merdeka lagi.

Mahasiswa juga dinasihatkan jangan mudah terpedaya dengan sebarang janji manis yang seringkali ditaburkan oleh kumpulan dan individu itu. Penulis percaya, mahasiswa tidak akan membiarkan perkara yang sama berlaku kepada negara yang amat kita cintai ini.